

秦安州志卷之四

藝文志

叙曰文以抒性靈而揚世教文之不可已也秦嶽之勝擅天下古王者之登封相臣之紀頌與夫  
騷人墨士之登覽而咏題者迄今蓋繼繼其富矣且載岱史及蒐玉者雖不必盡錄而州治中  
碑石序記可闕焉無傳乎概彼古今徵我文獻蓋不徒娛耳目騁詞翰云爾作藝文志

唐玄宗序銘

勒石嶽頂磨厓  
碑詳見遺蹟紀

朕宅帝位十有四載顧惟不德懵於至道任夫維任安夫難安茲朕未知獲戾於上下心之浩蕩  
若涉于大川賴上帝垂休先後儲慶宰衡庶尹交修皇極四海會同五典敷暢歲云再熟人用大  
和百辟僉謀倡予封禪謂孝莫大於嚴父禮莫尊於告天天符既至人望其積固請不已固辭不  
獲予與夫二三臣稽虞典繹漢制張皇六師震疊九寓旌旗有列士馬無譁肅肅邕邕翼翼溶溶  
以至於岱宗頂也爾雅云泰山爲東嶽周官曰兗州之鎮山實爲天帝之孫羣靈之府其方處萬

秦安州志

卷之四

物之始故稱岱焉其位居五嶽之伯故稱宗焉自昔者受命易姓於是乎啓天地薦成功序圖錄  
紀氏號朕承先王茲率厥典實欲報立天之眷命爲蒼生之祈福豈敢高視萬古自比九皇哉故  
設壇場於山下受羣方之助祭躬封燎於山上冀一獻之通神斯亦因高崇天就廣增地之義也  
乃仲冬庚寅有事東嶽類於昊天上帝配我高祖在天之神罔不畢降粵翌日禪於社首侑我聖  
考祀於皇祇在地之神罔不咸舉暨壬辰覲羣后上公進曰天子膺天符納介福羣臣拜手稽首  
稱千萬歲慶答歡同陳誠以德大渾叶度彝倫攸叙三事百揆時乃之功萬物由庚兆人允植列  
牧衆宰時乃之功一二兄弟篤行孝友錫類萬國時惟休哉我儒制禮我史制樂天地擾順時惟  
休哉蠻夷戎狄重譯來貢累聖之化朕何慕焉五靈百寶日來月集會昌之運朕何感焉凡今而  
後儆乃在位一王度齊衆法權舊章補缺政存簡易去煩苛思立人極乃見天則於戲天生蒸人  
惟后時久能以美利利天下事明矣坤厚載物惟后時相能以厚生生萬人事地察矣天地明察  
鬼神著矣惟我藝祖文考精爽在天其曰懿予幼孫克享上帝惟帝時若馨香其下丕乃曰會我

之文武曾孫其誕錫新命續我舊業永保天祿子孫其承之予小子敢對揚上帝之休命則亦與百執事尚綏兆人將多於前功而愆彼後患一夫不獲萬方其罪予一人有終上天其知我朕惟實行三德曰慈儉謙慈者履無疆之吉儉者崇將來之訓自滿者人損自謙者天益苟如是則軌迹易循基構易守磨石壁刻金記後之人聽詞而見心觀末而知本銘曰惟天生人立君以理惟君受命奉爲天子代去不留人來無已德涼者滅道高斯起赫赫高祖明明太宗爰革隋政奄有萬邦罄天張宇盡地開封武稱有截文表時邕高祖稽古德施周溥茫茫九夷削平一鼓禮備封禪功齊舜禹巖巖岱宗衍我神主中宗紹運舊邦維新睿宗繼明天下歸仁恭己南面網緼化醇告成之禮留諸後人緬予小子重基五聖匪功伐高匪德矜盛欽若祀典丕承永命至誠動天福我萬姓古封泰山七十二君或禮社首或禪云云其迹不見其名可聞祇適文祖光昭舊勳方士虛誕儒書齷齪佚后求仙誣神檢玉秦災風雨漢污編錄德未合天先承之辱道在觀政名非從欲銘心絕巖播告羣嶽

宋眞宗答謝天書述一聖功德序銘

卽陰字碑

朕聞一區宇而恢德教安品物而致昇平此邦家之大業也考茂典而薦至誠登喬嶽而答純錫此王者之昭事也結繩已往茫茫而莫知方冊所存章章而可辨罔不開先流福累洽儲休長發其祥永錫爾類故能禋祀上帝肆覲羣后追八九之遐躅狗億兆之歡心是以武王勦獨夫集大統而成王以之東巡高帝平三猾啟天祿而武帝以之上封曩以五代陵夷四方分裂嗷嗷九域顧影而求存顛顛萬民籲天而仰訴不有神武多難何以戡不有文明至治何以復恭惟太祖啓運立極英武聖文神德元功大孝皇帝積善自始受命無疆歷試於艱難終陟於元后威靈震疊玄澤汪洋無往不賓有來斯應濟民於塗炭登物於春臺俾乂萬邦成湯之甚盛咸宣九德文王之有聲啟運於前垂裕於後太宗至仁應道神功聖德文武大明廣孝皇帝洪基載紹景貺誕膺如日之升燭於率土如天之廣覆於羣生人文化成神道設教尊賢尙德下武後刑金石之音明靈是格玉帛之禮蠻貊來同書軌畢臻典儀無闕上玄降鑒虞舜之溫恭庶民不知唐堯之於變

重熙之盛冠絕於古先增高之文已頒乎成命逡巡其事謙莫大焉肆予冲人獲守丕構其德不類其志不明弗克嗣興罔識攸濟屬以陽春屆節靈文錫慶由是濟河耆老鄒魯諸生啓予以神休邀予以封祀不遠千里來至闕庭朕惕然而莫當彼確乎而莫止俄而王公藩牧卿士列校獻封者五上伏闕者萬餘以爲景命維新珍符紛委不可辭者天意不可拒者羣心天意苟違何以謂之順道羣心苟鬱何以謂之從人是宜登介丘成大禮敦諭雖至勤請彌固切念乾坤垂祐宗社儲祉導揚嘉氣僅洽小康俾大疆場以寧干戈以息風雨以順稼穡以登無震無驚旣庶旣富皆天之賜也豈朕之功歟雖則告成功紀徽號非涼德之克堪也然而序圖錄答殊禎非眇躬之敢讓也天孫日觀梁甫仙閭五嶽之宗萬物之始升中燔燎舊章斯在繼繩先志懿範遵己定之規祇事園壇嚴配肅因心之孝於是詔輔臣以經置命羣儒而講習給祠祀者罔有不至供朕身者無必求豐故玉幣犧牲朕之所勤也羽儀服御朕之所簡也情意篤至夙興夕惕誠明洞達顯應還彰自天垂恩正眞親臨於雲馭奉符行事子育敢怠於政經粵以暮秋之初恭享清廟告以

陟配孟冬之吉虔登岱宗伸乎對越奉寶籙於座右升祖宗以並侑禮之正也孝之始也乃禪社首厥制咸若於時天神必降地祇畢登朔饗可期奠獻如睹其薦也雖慙乎明德其感也實在乎至誠亦復酌鄴宮之前聞進甘泉之受計百辟委佩五等奉璋肆告施仁舉善勸治稽考制度採撫風謠文物聲明所以揚一聖之洪烈歡娛慶賜所以慰百姓之來思蓋又兩儀之純暇七廟之餘慶邦家之盛美蒸黍之介福豈予寡昧所可致焉唯當寤寐寅威夙夜惕勵不自滿假不自逸豫寵綏庶國茂育羣倫以答穹昊之眷命焉勒銘山阿用垂永世銘曰節彼岱嶽巋然東方庶物伊始玄感其章自昔受命反始穹蒼燔柴於此七十六王顧惟寡薄恭嗣洪猷乾乾慄慄雖休勿休元符昭錫餘慶遐流羣情所迫盛則爰修前王丕顯是日告成伊予冲眇無德而名永懷眷佑祇答景靈聿崇嚴祀用達精誠殊祥疊委寓縣奔馳禮無違者神實格思藏封石累刻字山嵒蒸民永泰繁祉常垂

事天以禮立身以義事父以孝成人以仁四海之內莫不爲郡縣四夷八蠻咸來貢職與天無極人庶蕃息天祿永得 皇帝臨位作制明法臣下修飭二十有六年初并天下罔不賓服親巡遠方黎民登茲泰山周覽東極從臣思迹本原事業祇誦功德治道運行諸產得宜皆有法式大義休明垂於後世順承勿革皇帝躬聖既平天下不懈於治夙興夜寐建設長利專隆教誨訓經宣達遠近畢理咸承聖志貴賤分明男女禮順慎遵職事昭格內外靡不清淨施於後嗣化及無窮遵奉遺詔永承重戒

尙書薛瑄重修東嶽廟記略

東嶽泰山之神故有廟在山之陽 朝廷有大典禮大政務則遣使告焉廟屋既久多圯漏弗治先是守臣嘗奏請修建而未克底完天順己卯泰安州復以其事達之濟南府因以上請 詔允修葺於時都憲年公富方議興役而去左副都御史賈公銓繼來巡撫乃泊巡按藩臬協議既擇有幹幕職以董其役復俾濟南府知府陳銓月一往以綜理焉銓始至泰安謂修葺嶽廟固所以

祇若 朝命致謹大神然尤當以省民財重民力爲本財匱民勞事亦非可因詢及守廟者具言數十年所積禮神之物甚富遂遣人持市木之巨細與其他修屋之不可缺者及既合而匠役皆在官之人而農民不知有役銓既綜理有法不急不徐始事於天順庚辰秋七月辛巳夏五月訖工殿宇周廊門觀繚垣悉皆完治咸願刻石以紀其事山西按察司王允濟南人也以書來求文於瑄余惟東嶽泰山之神爲諸嶽冠聖朝既正其名秩其祀而廟弗治又俾所司以時修葺而巡撫憲臣泊藩臬得綜理其役如銓者不竭民之財力而克底完新皆可謂祇若 朝廷丕顯休命而致謹於人神者矣遂序其事而銘之曰一理宰幹一氣互根清浮無際濁墜斯存柔行剛峙川洪嶽尊惟此泰山造化鍾萃龍從太虛磅礴厚地匪營邦瞻實衆嶽最其蓄罔測其施靡量玄雲寸石甘雨八荒功既載溥厥報宜彰有廟在陽奉命新葺重臣是承守臣是職民不匱勞事底完集殿宇廊觀聳卓榮迴高下中度不驚不卑神氣鬱鬱流通在茲昔古山川明祀有體夫何前季封號薦起儕嶽於天案三公禮逮我 聖世道復古隆斥絕僭誕率由大中嶽鎮海瀆悉正其名

惟岱宗神稱允格迄茲有役咸願刻石述理繼辭以示無極

照磨李欽修東嶽廟記略

嘉靖丁未冬嶽廟災殿宇廊廡以及賓館齋居門闥樓觀蕩然一空其僅存者後寢三殿與炳靈延禧二宮而已時守臣以狀聞 上震異者久之既俾治有司不戒之辜而遂勅以亟修之議然歲值累歉未克興事者垂十年餘辛酉秋八月 皇上萬壽爰命太常緘祝函帛恭詣嶽神虔修醮典有司命布席將事惟時巡撫都御史鎮山朱公承 命主祀大懼簡陋罔罄明禋乃謀諸藩臬庶正展力亟圖而特委濟南府同知翟公濤專董其役蓋選能也公乃檄請當道材木領贖金石之類以至匠傭役廩皆取給香帛而秋毫不以煩民經始於壬戌春迄癸亥夏廟工告成自殿堂而下毀者以舉傾者以易圯者以完漫漶者以鮮以潔丹雘塗聖輝光掩映巡撫都御史石洲張公祭告祠下樂觀厥成是日也淑氣洋溢靈光下矚泰嶽明神既尊且安自是而往陰祐顯相雨暘時若而豐年應災病殄而民氣和以永保我國家無疆之慶則神之功當與天地並而君子

謂翟公之有功於神也其亦偉矣哉

運同查志隆表章韓范歐陽諸名賢遺蹟議

照得泰山形勝古今登覽遺蹟種種無庸殫述夫藝文尚矣人品急焉惟其人誠賢故其言誠立卽片語隻字而姓馥名馨當世想見其丰采後世聞之莫不延慕興起何論模仿其文華輒欲刑儀其質行以此磨礪人材維持世道故其遺蹟有足多也竊見岱廟西偏 御香亭之右自古有環咏亭一座其來久遠不知創自何代何年蓋四面垣墻俱石刻先代名賢題咏聯翩手筆而亭宇介於其中瞻顧諸所題咏若環繞焉故因以命名也其間名賢之最著者若韓魏公若范文正公若歐文忠公若蔡端明蘇子美梅聖俞林和靖石曼卿諸公皆先宋人物其手筆尤不容湮沒者奈何近歲亭宇久廢尙幸亭之稱名存於舊志中職按舊志而求故址則彼鄉人士絕無知者展轉諮詢延歷時日今幸得其故址幸四面垣墻石刻依然尙在只廢缺一隅更幸韓范歐蔡諸名賢手筆無恙惟是塵埃滿壁未易分披污穢蘊崇不堪舉趾職於茲深慨焉俯仰古今其責在

後之君子若不及今爲之表章則四面垣墻旦夕盡廢不僅僅廢一隅而已何忍諸名賢數百年遺蹟當 盛世而湮沒豈不媿於斯文哉况舊貫可仍不由新創而一亭工費爲值幾何合無仍其舊址復構亭宇仍匾曰環詠而四面墻垣題咏見存者拂拭之其一隅已廢缺者卽將 國朝名賢題詠補入而繕完之則豈惟更新先宋諸名賢遺蹟而益彰 國朝人文之盛豈惟增光岱嶽相爲終始而於所謂磨礪人材維持世道者未必不藉此而興起也

提學鄒善撰儒學闢路建坊記

予校士泰安羣諸生會於學宮諸生請曰道德之旨尙矣今世功利之習漸漬已久而以此語之其柄鑿之不入乎曰彼未見道德之大耳誠見之自不肯舍此而趨彼也執塗之人謂之曰斷汝數指畀汝中人之產汝願之乎稍知自愛者必曰不願也又執塗之人謂之曰斷汝臂畀汝上卿之位汝願之乎雖甚不知自愛者必曰不願也則臂指重於富貴明矣吾心獨不重於臂指乎曰今世談道德者似亦有見而終爲所奪何歟曰見未真耳談虎傷人人莫不懼而色變者真見虎

者也平居言惡臭亦皆掩鼻然急趨而速雪之者惡臭之在厥躬者也故夷齊舍千乘之國而逃其識仁之真而期必得乎林回棄千金之璧負赤子而趨其真識天親之不可解乎不然富與貴亦人所欲也彼何獨捐之如敝屣而輕之若鴻毛耶泰安州學創自宋而擴於我

朝規制亦壯然北稍低而面頗隘前學正余維玉倡諸生市地築基於役欲建閣未就諸生李汝桂李應時等請於州曰學之前狹隘弗稱視閣之役尤切願先擴之於是楊守山捐俸以倡學正黃鍾等及諸生各出廩以資鄉士夫李欽等助鄉民聞而協助之於是市民屋四所長若干尺廣若干尺以廠其南中建綽楔曰見大心泰東引流水由坊南而西繼而楊守緯至以圖終之而紀石乃肅諸生以請於予願一言以詔於學予曰諸生安可他求哉卽斯路之闢可以知矣昔也面墻而衆卽鬱然今也藩籬撤而衆卽廓然吾心亦何異於是瀕擴與塞何如耳塞則封閉如蝸視骨肉若讐敵出門有礙矣擴則四海一兄弟也九州一肝脾也焉往而非坦途讐敵之於兄弟脾肝遠矣而不出乎一念之通塞人願可弗見其大乎惟真見吾心之富不可以量數然後知千金之

璧可以言富而非富之至吾心之貴不可以量數然後知千乘之國可以言貴而不可以言貴之至而况微渺之功利亦何異毫末之在馬體梯米之在太倉安足以攫其懷而奪之耶茲欲處一化齊以臻聖賢之堂奧豈可不闢斯路以見其大乎諸生忻然曰是可以擴吾隘矣遂書以爲記若曰建閣以稱斯路則以俟後之君子

金學士黨懷英魯兩先生祠記

魯兩先生曰孫明復石守道氏宋祥符天聖間以仁義忠孝之道發於文章爲諸儒倡當世大儒如文忠歐陽公文正王公皆尊禮之故其沒也歐陽公爲誌其墓蓋比之孟軻韓愈之流其羽翼聖經立朝行已治行終始偉如也初兩先生築室泰山下以爲學館屬大關嶽祠孺基甫迫乃北徙山麓而以舊館爲柏林地歲分施錢爲養士之費學者至今賴之而鄉人指以爲上書院則其所徙地也大定間嶽祠火越明年有詔營建乃命更新廟學已而諸生相與言曰昔兩先生宦學汶上汶學祀之不忘吾儕居其鄉食其德乃遂已乎於是兩先生諸孫聞其言更出所有作爲祠

堂於大門之左以成學者之意石先生之孫震使其姪翊走京師屬其門婿黨懷英書其本末將刻諸石懷英曰兩先生之道垂於後世炳如日星奚患無傳雖然有一言焉方孫先生以春秋之學教於魯石先生蓋師事之時給事孔公道輔聞其名自兗來謁孫先生既出應客而石先生執杖屢侍其左右升降拜伏皆扶之其往謝也亦然繇是魯人始識師弟子之禮士風爲之一變近世士尙剽竊以從師親友爲耻忠厚之道不著久矣國家尊經養士將使人人爲魯鄒固當師承鴻碩因文以入道德之奧而後游兩先生祠下而食其餘庇可以無愧矣

李汝桂重修城隍廟記

洪惟我

太祖高皇帝肇造區夏首正祀典以禮百神自

京國而郡而邑莫不設有城隍之神凡壇祀風雨山川城隍與焉卽厲壇之祀亦以城隍主之凡吏於其土者必先詣廟誓神而後視政或值水旱時疫又皆奔走號呼竭誠請禱是蓋以神爲一方

保障禦災捍患祐善罰惡吏治所賴以底績生民所依以爲命者也則夫崇飾其祠宇致嚴於祀事固非有司者之先務哉泰安城隍廟在州治西二百武建自

明初屢修屢圯嘉靖歲癸丑以來廣安星泉鄭公臨汾頤齋徐公相繼守州始撤而新之殿寢門闕露臺廊廡制雖仍舊而恢拓壯麗視昔過倍矣于今垂三十年風雨浸剝棟宇多就傾圮金碧丹雘之飾漶漫尤甚萬歷乙酉春解梁約所劉公由元氏尹擢守於茲始下車謁廟輒惻然興懷亟欲修葺而未遑也越二載丁亥自春徂夏久不雨百穀皆槁公憂形於色躬率僚吏士民徒步懇禱於神天乃雨槁者復蘇既有螟蝗遍野禾幾無秋公復爲文引咎自責淚涓涓下螟蝗卒不爲災公乃刲牲告謝且謂寅佐永清奎台武公密雲玉池馬公曰今日我民所以倖免溝壑我輩得以終奉官常者皆神之賜然廟爲神棲像爲神肖顧敝陋若此非我輩之過歟於是首倡捐俸若干金付耆民王嘉才韓東魁董修葺之役時州之鄉大夫士與民之尙義者羣然響應輸財効力眞子來若也甫三月餘傾圮者易漶漫者鮮廟貌整嚴金碧輝映落成之後大雨如注者連朝土

膏沾潤麩麥盡播來歲之豐稔可望百穀之市價底平民心可恃以安堵而無懼也君子謂城隍於是乎有靈其所以福我蒸民奠我疆域者豈有涯哉然財不假於賦調役不繁於追呼固神之靈貺所及亦公之善於綜理致然也僉請勒石紀其事桂不肯以衰朽從鄉大夫後乃拜手稽首颺言曰

朝廷設官寘吏欲其敬神恤民事雖有二理實相須敬神固所以恤民恤民者亦未嘗不敬神也公以廉明仁厚之德當此饑饉荒歉之候痾切身節愛百倍爲民請命竭盡衷曲則其一念感格之誠固有出於修飾廟像之外者矣是敬神恤民豈復有過於公者哉况其所修神宇學宮魁閣賓館與夫城垣綽楔之類興衰補敝煥然從新則其所以偉觀悅神人而裨益政教者功德種種流芳泰人之口碑更僕未易盡也茲特因修城隍一廟而述其顛末如此功始於皇歲六月二十二日訖於九月之望日其尙義捐貲者則列其名於碑陰云

知州任弘烈撰泰安州儒學尊經閣記



明朝以明經取士經何可一日不尊也兩雖郡邑學皆有尊經閣閣皆宏傑藏經其中時時集博士弟子員校讐之獨泰安學無尊經閣二百年來莫或舉之以斯知作者之難也

鄉先生少保蕭公知閣制闕狀迺於敬一亭舊址捐貲飭材構閣五楹崇基峻宇巍然煥然而工未告竣越癸卯令子虞部君奉使還里中鳩工而益其材閣遂落成屬余記其事余惟六經道之文也道不明匪傳經不明匪尊語曰秦人焚經而經存漢人解經而經廢夫天地人文烏有存廢此爲漢儒牽合附會而不能明經者罪也今之擅稱明經者朝夕掇拾餽釘纂輯括帖委瑣於句章文字之間胸中略無廣大高明之見以自壯其名曰鄙間有一二豪於文者日取漆園柱下寓言與方技釋子之說論稍稍鼓其唇吻而濯其波流以號於人曰吾能文其名曰舛甚者妄增意見別立門戶盡舉漢以來儒者之說而土苴之而猥以支離不經之見強爲講解其名曰裂之三者將以明經益以蝕經何以尊經祇以瀆經噫敝也久矣夫秦介齊魯之區而孔顏過化之鄉也少保公以名進士起家駁歷中外四十餘年入則周公召公出則方叔召虎生平作用與古大

聖大賢相等埒蓋其幼學也務明經之實而其壯行也收明經之效爾多士今日有能繼少保而興者乎相與踵其閣口其書疊疊而思曰吾不敢爲俗儒之剽竊懼其鄙也吾不敢放浪而逸於桀懼其舛也吾不敢以臆見爲傳合懼其裂而不可訓也第以六經明諸心取而規諸事居爲醇儒出爲良吏退而以其行與義薰於鄉以微善其俗將使齊魯之間振孔顏遺教而復用周公召公之舊也則於六經可謂一日千古已豈特尊之而已哉茲今日建閣意也余每見世家名胄往往於佛廬道舍喜博蠲助之名而宮牆閣宇曾不置念然則肯堂肯構如公父子者可謂過人遠矣爰記之以諭諸多士

知州任弘烈撰泰安州勦建義倉記

泰俗故囂悍而鮮蓋藏偶當歲稔輒嗷嗷待哺于有司余叨牧之明年爲癸卯夏河伯爲災人人魚鼈淪沒者無算愧拯溺無奇策遍請賑于上官還報曰可計口而賑計畝而賑計間架而賑民頗就席旣而閉閣思之曰緩急不常庚癸難繼區區取給于公儲非計也廣蓄藏爲今日第一義

于時卜郡城隍祠之偏東得隙地隘於基也稍東安生烜之故基可丈五許出微直肯之鳩工飭材命耆老秦九思朱履董厥是事且戒之曰無虛曠無冒破無煩于百姓僚友許君義其舉慨然身之若崔若胡各力贊其成構堂房五楹東西各三楹圍垣甃以石甫閱月而工告竣扁其門曰義倉二三僚友相賀曰此義舉也第囂悍之俗二稅且難誰肯出己力以實外廩余曰不然民不可以威劫而可以義動語曰舉大木者呼邪許今日之舉邪許之呼也安知無慕義而來者乎况輸之于今日取之于他日非己失人得者比也言未幾耆舊人等輦負而輸者雲集嗟嗟此勺水也僅可以潤焦喉若夫顧其名而倡率之因其制而恢擴之嚴稽考而不爲歲月沒時修葺而不爲風雨侵敬有俟于來者余何能言今將斂散之法開附

初建社學記

泰山號宗五嶽地靈人傑舊矣以故賢喆疊興爲時良弼海內之望泰安無異五嶽之宗泰岱也亡何邇來科名寥落豈氣運盡然而草木枯于眉山耶抑鼓舞無術而職提調者與有責也余撥

泰安州志

卷之四

十

宥選諸生爲父會嚴課程示激勸人人爭相砥礪不半載而各就矩矱第承蜩之技妙于凝神工不居肆何以成事卜治之東南隅捐資建社學一所堂五楹東西廡房各三楹門樓一座周圍環甃以石扁其堂曰聚星堂之後餘址構築可以稱是畢集羣英肆力本業以挽頽運亡何余奉滇南之

命業未卒而西歸有期嗚呼締造不易興起有時樂羣敬業唾手雲程期不負今日之舉者諸生之事聯師儒羣子弟預儲他日之良弼者端有待于同志者也是爲記

侍郎鄧庠記泰安守高公去思碑

泰安太守高公諱嶼字洲貫蘇州府崑山縣世豪錦衣衛由順天鄉貢登弘治壬戌進士官彘史左遷新鄉尹繼陞是守邁種德民懷之時遭流寇蠱起山東被其殘破者十有七八公用力修城池以預防之民不告勞非信而後勞乎一旦寇至被圍民固以公爲主公獨以心爲主毅然不動披堅執銳與民守之效死弗去有一寇號破城王奮然率衆登城公先敢勇斬之民亦有獲功者

焉寇皆落膽而退幸全萬人之命如是者三士夫以三捷頌之各賦詩詞由是見重當道數旌異之其詞有曰才優治郡心切愛民未幾二載擢工部都水司正郎斯民願借弗能送者遮道莫不思之如父母濟濟告于二守爲立去思碑以垂不朽二守予同里人也不沒公善備述其實走幣徵予文以刻之予斂衽嘆曰誠古之循良也豈但今日一郡思之而已哉將來不次陞擢澤及多方而多方思之不下有孚故樂爲之記

教諭李汝桂記泰安守袁公去思碑

維茲辛巳夏六月玉田袁公守泰安四稔矣乃擢藩藩右史以行郡之民老稚奔走號呼遮道擁留而不可得於是謀於鄉大夫士立碑公門以永不朽而屬記於余余惟公之遺愛昭昭在人耳目固不待碑而傳然非此固無以志吾人之思也夫人生所恃以不朽者太上立德其次立言又其次立功而爵祿名位不與焉士君子攀躋華要休游易簡每恨不能有一於此以傳天下後世而况當困疲之郡居繁劇之衝任勛勩之職而能以是三者悉舉而備之於其身則其所尤難矣

泰安州志

卷之四

十一

我公以海內人豪筮尹高苑有惠政百姓爲立生祠遷倅東昌再以循良振譽及其蒞我泰安人或以難治語之公曰春雉率馴夜蛟知化物猶如此矧爲羊叔子孫復石介鄉耶絲是穆三能敷五教闢闢弘化寢鐘體國節理羣情隱恤民務惟日不足郡之不得其平者莫過于戶徭糧二事公兩番審戶多方稽訪不避豪右高下皆稱其情茲者奉例均田冒暑郊行度地定則法繩不苛不縱民瘼以蘇尤莫弊於稅事舊惟皂卒催科一入鄉雞犬輒弗甯及其來輸而大戶居家收受任其尙索莫敢誰何公特露布傳諭遠近之民牛車負擔而至者踵接嚴督收人羣聚倉所而無所售其多取之計里甲輪年舊分衙支候且館谷過吏費出不經歲過役竣而室已罄懸矣公約法摧徵之外毫無所擾兩稅告完卽放歸農剗其例餽蠲其役使裁省其冗費不下萬金去額外夫馬又二千五百餘金眞所謂如解倒懸也郡有孳養馬四百餘匹民苦爲重累及其解俵一無當於用者公請於當道奏聞下令除之諸省並受其福自昔詞訟皆以公役勾攝至城先羈以窩固必饜足酒食財物而後赴理公悉令告者自拘至則進決於庭無少留滯其平和自息者亦

不窮追民甚快焉至若捐俸買牛三百餘隻開墾荒田凡七十八頃建立官莊十餘所招撫流移凡一千八百餘戶設法積穀以備賑荒一萬三百餘石禁除兇頑以安善類又凡若干人此尤其表見者而修學校以崇教化嚴武道以待暴客浚泉源以資運道建橋以濟涉修獄以防虞鋪街以利行人又更僕未易盡也下車以來百費俱興維吏憚嚴維宥懾明維狡伏威美哉蕩蕩乎政以庇戶矣其古之遺愛乎然猶未也公之字民勞乎致理勤矣猶且銳思於文苑攜藻於臺端會通於訓典定命於聖賢足志於經綸是故蒐玉有集可以觀博焉神龍有讚可以觀敬焉喜雨有詠可以觀仁焉登嶽均田有詩觀志焉暇則羣諸士於學宮論文談道指示要領每至饑疲不忍去可以觀教焉美哉颯颯乎文以飭治矣其古之遺言乎且處達而寵賂易章宦成而志節易淪公潔組以至得代超情物外含靈性中以心而身以處而出門無私謁政無賄成迺冰其清迺玉其潔風抗其高雲垂其澤前此罕其儷也是故揭聯郡齋自明心迹則曰百年知己青天在萬事無私皓月懸一趙清獻之遺意也入覲郤遺題壁途次曰十年不改冰霜操暮夜堅辭百姓金一

楊伯起之清風也節用愛人雖膏薪之費不以煩民其惠溥矣端已平物未嘗有疾言遽色以及人其度弘矣美哉融融乎行以彰軌矣其大雅之不羣乎夫政以庇民功也文以飭治言也行以彰軌德也公之去不可留秦之人士銘公於心碑公於口千百年當如一日也而尚可朽哉雖然公天下之望也自茲而往翼贊 王猷斡旋元氣以揚休烈於盛時其功德與言之所建立者方未艾也泰安百里之雄耳豈能久稽長者輿哉噫召公在南甘棠繫思羊公在吳峴山墮淚泰之人士他日思公而不可見見此碑如見公也此固立碑之深意乎於是衆始釋轅避轍而公驅車就道遂次第其言以勒諸石後世史傳循吏未必不有取於斯文也公名槍字大實南畿之懷遠人玉田其別號云

豸史趙弘文撰侯公崇祀名宦序

祀典不云乎有功德於民則祀之能捍大災禦大患則祀之刺史

侯公之蒞奉符也不腆庶郡丁龍蛇之交千里若赤下軍卽撫摩凋瘵安集棲鴻捐資以爲之牛

開渠以導之利從事于寒風烈日間盡力溝洫易棒蕪爲沃壤民乃有天而

國家乃有賦壬戌蓮妖之亂山左岌岌無堅城公經略郊鄙綢繆雉堞簡豪練俊撲勦四出殲厥渠魁境內覆盂而隣封亦賴以安堵民乃有命而

朝廷乃有封疆其所最加意者莫如司徒之教念典有程蒙塾有訓色笑臨泮臯比林立開示指授亶亶不倦一經祝嘏靡不速化迄今奮袂青雲者皆所濯而翦拂之者也士子乃有功名而

社稷乃有臣至於新殿廡飭俎豆輸俸以置學田稽古以勗祠宇而

聖賢昭盼蠻督陳

六諭嚴斥左道遍及遐邇而閭閻乃著彛常黜櫃頭解戶而僉以官汰力役漕運而出于公而鄉遂乃杜追呼一是陋規則罷之百凡行戶則除之而市井乃安財貨其他當興輒興當革卽革良法美意未易聚米數而更僕終七年如一日萬緒咸清纖塵不染是公之造我下土功德捍禦千萬世之烈也質之祀典疇曰不宜則吾民之報之也能一世數十世而已哉故于其資轉也則奔籲

秦安州志

卷之四

十三

而借于其內召也則攀臥而留及聞其易簣也則罷市停春而哭聚族而謀旣爲肖貌于專祠復丐正席於黌序請歷

兩朝事經補牘而尙懼其弗克享也齋沐肅主爰輯頌末以詔來茲六此其大端爾里閭婦穉之所能言者更委而詳則口碑難泐不介而馳已文備員柱下例得載筆以告彤史而舉一漏萬桃李之有忤于桑麻也夫

少司農王度撰侯公從祀名宦錄序

鄉賢之典獎善也範俗也繡衣固有同好情得而參之矣名宦有祀崇德也報功也尸祝垂於億禩而三代之直道行焉矣兩典並重而名宦未易數數見萬歷乙卯歲山東大稔丙辰中州佩之夫子來守吾岱公詳于荒政民不爲災不作奸不作惡茹吐交詘無寬猛水火之形而四境業已大治三載考績以最聞旋以郡丞奪公去岱人聚謀泣留於當事之庭會直指陳公以加銜久任請得命旨岱人始嬉嬉而退公開墾散游食之徒文字肇麟經之祖尤加意於前賢往哲以及驛

傳供帳孤貧約訓諸務一時機聲與書聲相錯吏畏與民懷並詠雖鄒滕變起勢若燎原而衆志成城吾鄉晏如越七載晉秩秋官耶叩閣不得信人始斷木伐石建生祠祀公再越二十餘年復請崇入名宦

今上御極之三載仲冬朔祀典禮成中外歡呼人心爲之一快行將以德政實錄付梓人以告來茲州人氏命度爲之序夫芟舍有棠岷山有石公能自爲不朽余何以序公而公又何俟需序于余也嘗思君子之居人國也所在無赫赫名去後人見思業已無名何榮思業已永思當年何以無赫赫名也低回前芳其于我公愈不能已公胸羅二酉讀盡未焚之書製裕補袞巧奪天孫之杼惟是善行無轍跡如鹽味行乎水中公與百姓相洽百姓亦與公相忘赫赫之名公直以敷政優優者謝之矣亡何政成公去而太平盛事咸與公俱往堂廡丘墟念棟宇之璀璨者思公有女妣離念士婦之依眉者思公城虎社鼠念法自近始者思公土虎食人念遊雷之震疊者思公况今日之醫瘡剜肉誰非當年之恬養耕鑿今日之拖金衣紫又皆當年之執經問字者乎岱人之思

公者惡容已矣始而留既而祀久以名宦請請以必得爲快余直以三十餘年未泯之人心當我公千萬祀不朽之竹帛岱高汝永其於公也或有當乎嗣有考古者請問諸代言之名宦錄

少司農郡人王度撰僞官據城記

鼎革之際不忍言也然而覆車之鑒其實難泯白刃之餘節義乃見按故明崇禎十七年甲申春三月闖寇李自成僭稱大順永昌元年京師失守州守朱萬欽封印官庫返歸故里四月初僞州守史可保至士民伏道遠迎俱見優禮越數日僞防禦使至牌示道前大書軍至軍妻軍去民妻八字州人大懼繼而檄州掣大行樸庵趙公尋鄉紳下獄將以新作非刑拷餉僞州守未可但羈糜州庫中尋釋還家俾各輸餉原任遊擊高桂鄉民許來春糾鎗手百餘人伏南城外平日奪門突入僞署高桂當先衆鎗手吶喊齊進防禦驚避刺中其臂併其黨數十人執赴遙參亭前衆公聲其罪斬其首從者盡誅僞州守伏俯待罪鄉紳釋之次日有郭僞將自南而北聞僞防禦見誅攻陷州城布衣馮魁軒聚其妻及子女於一室闔家自焚死賊肆行殺戮死者不知其數許來春

碎屍尤慘遊擊高桂死之而紳衿亦復多人惟執趙蕭二公俘獻爲樸庵者忠貞自矢不降不辱引刀刎頸血流背項守者奪其辦公忍死待斃終不屈蕭亦大苦縲絏及聞闖寇兵敗西歸乃克生還先是余在京師三月十八日寇陷京城五月初旬

皇清兵臨闖寇敗亡爲州守史可保西竄過肥城縣爲土兵所殺余始南歸六月抵里與聞前情竊以聞知之或略也訪於樸庵趙公公云甲申之禍四月二十九日事也始於防禦使籍名捐助酷烈百端人人飲恨未及發也高桂武弁素賦血性於此賊遂甘心焉又恐發難後悔懼禍潛逃遂多方慰之相與共守南門蕭啟濬則分派西門者分派甫畢闖逆鄧昇自兗州府而北矣次日有十數騎至南關居人韓宏教等爭殺之未幾大隊至約三千餘騎四面環攻城未破高桂射傷城頭自己至申賊爲飛礮矢石所中者約五百餘名賊計無復之相議更餘撤圍去不意天禍茲土蕭啟濬潛至北門延賊登城蓋自爲妻孥計遂失守焉時罵賊死於城頭者舉人徐楠也屈指生員與賊巷戰爲羣賊射殺者王德昌也引頸就戮者房伯龍黃應瑞劉孔訓蕭獻吉是也三日與

賊怒相爭分辯是非死者楊應薦胡會隆也是日弟聖文猶多方駕馭羣賊此時始知原任治中蕭協中醫生員國鉉以投井死至初四日余與聖文弟械擊而東聖文乃罵不絕口至春牛廟以東遂遇害其不見者不敢列焉相提而論在當年高桂實爲戎首以國亡與亡論此段義未可少者至蕭啟濬雖禍及滿門似又非一日所能償者噫當日情景如此公蓋見而知之誠信史矣此以見凡有天下國家者皆不可不鑒前車而弭亂高節義以維風也遂因事而記之

少司農郡人王度撰歷年城守記

城者禦暴保民之所乃鈞是城也樂毅下齊七十餘城而彈丸卽墨乃能轉敗爲功唐安祿山之亂大河以北無堅城而顏真卿乃能以平原一隅阨其吭可見綢繆桑土所守在者百雉雲連衆志成城所守在帷幄折衝守之義大矣哉泰安依舊作城巖險著聞自故明正德辛未流寇劉六等殘破之後鈴柝不事者百有餘歲逮崇禎末造饑饉荐臻盜賊蜂起至辛巳彌甚三月內土寇閭松亭糾衆數千攻城越三日弗克四月間史東明有衆十餘萬自南塞野而來分立營寨四面

環攻守道左珮弦暨鄉紳士民枕戈城頭十晝夜各關廂分遣鄉勇殺賊甚衆馳檄總鎮劉澤清  
援兵至乃解圍去先是簡鄉民有胆力者寵以事權分汛防禦名曰勇若輩狼子野心貪橫無忌  
十月內出得茂等二十餘人自城叛出號召伏莽萬餘攻東門將陷韓守備兵至擊走之猶勝國  
事也歲甲申

皇清業已定鼎山左首入版圖威靈遐暢守土者怠於設備順治四年十二月內暮夜警報狎至郡  
守宋誌猶延賓歡飲馬賊滕天鳳等百餘騎三鼓至城下架雲梯自東北隅登大開東門率衆入  
州衙殺其賓于當筵宋公亦面中刀傷遂肆行殺戮百有餘人前博平教諭徐來聘見執不屈罵  
賊遇害賊直入圍圍取其家口放獄囚劫倉庫掠民財焚公堂及民房百有餘間達旦飽颺而去  
莫知其向逾歲戊子十月土匪孫玉吾窺城北郊無人率衆數千攻打北面時州守周承吉公出  
州人倉皇守禦賊箭如雨發守者立脚不定城將陷適庠生士無欲領鄉荐先一日自省歸聞急  
登城當先力禦各執大石拋擊當者立仆又用火罐燒死賊數十人奪雲梯十二架賊乃却夜遁  
去按孫子云殺士卒三分之一而城不拔者攻之災蓋言攻之難也攻之難則守之易憑高視下  
以逸待勞苟能上下同心則兔置武夫可作公侯干城維茲岱城

泰安州志

卷之四

十六

鼎革前後二十年間被寇者凡六次而功成保障民社無虞者一而二二而三三而四矣之二役者  
雖曰失守然一緣於典守者之輕忽非滕寇之強有力而衆之難爲守也一則闖寇郭偽弁之變  
其禍甚大其事更慘余于僞官據城紀事中詳厥顛末而叩厥失計則由于意在媚賊者拔賊登  
城以一人悞衆人非衆守者之力不爾克也平原卽墨之遺烈猶在余故于六次守禦情節表而  
出之以告後之與君守者

知州戴經岱郡人景詩

蒼茫浩宇望朝暉湧壑摧峯駭若獸一氣鴻濛滄海接兩間砥柱岱宗尊神龜幻影占霖雨老蜃

含精散彩縵挂笏也知看未了萬年留此鎮崑崙

秦嶽朝雲

徂徠猶種魯人松落日蒼蒼萬古風龍挾雲還岩石潤蟾隨霞上海天空也知虎豹潛林外自喜



芝蘭滿谷中兩眼簿書眞俗吏山靈不語笑古儂

徂徠夕照

汝水湯湯一脈深巡崖轉壑下千尋落虹萬古垂流影飛鵠三秋駕漢心荷擔長途誰穩坐垂綸

荒野幾高吟輿梁莫作尋常事濡足褰裳正不禁

汝水古渡

明堂何處草芊芊落日荒煙萬井田四國會同周盛日九重巡幸漢豐年天開形勝猶今古地握

綱維本後先却嘆牝雞鳴武墨聖王禮樂可容專

明堂故址

四郊無處不秋成禾黍龜陰獨擅名贏博不終齊國好鄆謹猶復晉人爭中都自古誰稱宰夾谷

乾坤幾會盟老我專城空碌碌日星聖道正輝明

龜陰秋稼

何年古洞有潛龍平地風雷起太空山岳晦冥隨上下江湖顛倒自流通借車曾訝朱門宿分硯

眞驚白晝封滿眼病禾興宋握官輸豈在雨聲中

龍洞甘霖

野鶴孤雲自往還空名千載信朝班奮髯特立雲霄遠偃蓋長留歲月閒岱嶽托根直峻地羸秦

承命却慚顏四時秀色何曾改桃李春風未許攀

秦松挺秀

泰安州志 卷之四 十七

東封玉輦不聞音柏樹猶能慰訪尋一代精神看翠藹千年物色在蒼林水簾洞口風偏急御帳

亭邊雪正深到底凌寒誰可共老松鬱鬱是同心

漢柏凌寒

知州林杭學岱郡八景詩次戴刺史原韵

岱宗膚寸擁朝暎萬壑須臾一氣歎忽覩彌綸天不外方知渾沌嶽尤尊絳衣晴起浮華蓋紫輦

晨歸導彩繡縹緲到中宮闕象

漢光武時泰山雲氣成宮闕 秦嶽朝雲

獨秀峰前落照紅

徂徠惟嶺秀峯最高

千巖颯颯晚來風竹溪雲徑層嵐掩

竹溪爲唐六逸隱處

桑海霞樓倒影空石澗蒼

松明滅外金支翠羽有無中兩先生去祠堂古留得靈光照魯東

有孫明復石守道兩先生祠 徂徠夕照

導汝原山百折深

汝水出萊蕪原山

禹餘貢道尙堪尋惠民聊見輿梁政濟世尤存舟楫心洙泗合流通伏

脈滄浪清興遣閒吟日斜莫道無人涉寄咏邛須自不禁

汝河古渡

城南城北草綿芊周漢明堂盡野田

周明堂在嶽東北漢明堂在嶽東南

展障青山猶此地變輿黃屋已當年蓋茅通

水軒皇後檢玉泥金虞帝先誰使東巡亡狩典強侯廢毀得私專

明堂故址

萬寶秋來盡告成龜陰映壤舊知名今同魯頌豐年瑞昔異齊疆列國爭歸地邛謹書美績取禾

周鄭濟要盟何如盛世安耕鑿勉竭租庸答 聖明 龜陰秋稼

泉竇雲根絕壁叢臥龍騰忽廻凌空 白雲洞在嶽頂西南鳳凰山陽 九垓霖雨崇朝遍四瀆精靈暗脈通涇水還書

誰扣樹灌壇歸珮自生風兩年步禱隨甘澍滿日桑麻慰望中 龍洞甘霖

輦道登封萬騎還蒼髯因受紫泥班一朝梁棟俱何在千載林泉獨得閒故節不移唐宋號枯枝

猶傲雪霜顏無端緒盡湘山樹留此干霄不可攀 秦松挺秀

西京杳邈柏梁音嶽巖蒼涼尚可尋三戶茂陵何處樹十圍秦時尙成林鑪峯黛色參天迥龍窟

蒼根入地深芝艸琪花皆偶現何如長保歲寒心 漢柏凌寒

署州事同知張肇昌步戴刺史八景韵

擁出東溟斂曉噉氤氳石窟望中歎氣蒸九漠天如接影撼三齊闕自尊俗吏遙看迷碧嶂仙人

持贈有丹縑磨崖碑畔游龍護曙色疑浮海外崙 秦嶽朝雲

泰安州志

卷之四

十八

巒暉斜映樹頭紅六逸堂開淡淡風石面散涼驅犢晚溪心含影亂霞空魯戈難返長天外雷劍

應懸落照中願策玉鞭登獨秀賦詩回首五雲東 徂徠夕照

汶河抱魯伏流深源委須從夾谷尋一帶縹紋通濟渙百川環碧潒波心褰裳盡有澄清志垂釣

寧無汗漫吟野渡只今蕭瑟甚西風乍起思難禁 汶水古渡

明堂豐草綠芊芊王政無由見井田鎬洛朝宗原百國魯齊巡幸已千年膠舟南渡蕭條後鞞鼓

東聞戰伐先借問青陽何處是名山舊址有誰專 明堂故址

龜陰繡陌賦西成滿頃黃雲擅美名禾傍汶源秋有色田歸魯壤昔無爭祇緣聖德能消敵不信

強侯肯讓盟貽得村村勤穰 稊宵來社鼓樂熙明 龜陰秋稼

古洞龍蟠怪石叢宜潛宜震總凌空神源呼吸乾坤合靈氣升沉江海通霧暗樹頭千澗雨雷鳴

峽碑萬山風知君久已修麟角應向雲衢際會中 龍洞甘霖

雲壓枯枝伴鶴還當年煥詔立鷓班雖嫌三錫名猶染却喜孤懷韻獨閒化石何時看秀骨含脂

無復見蒼顏短長憑爾詩人口到底高風未可攀

秦松挺秀

柏梁臺畔久無音剩得森森茂幾尋峻嶺黛螺連翠色古壇日月傍寒林劍懸季子腸偏俠庭誌

萊公蔭自深四壁霜濃

槐那得似貞心

漢柏凌寒

按泰山之大也孔子登之而萬世傳焉文云 乎哉茲乘所載磨崖汗簡碑松紀述無非 作者

而理道之顯晦政事之汙隆燦然大

後之人誦其言想見其人能無興起於

文也歟

如以藝焉豈已者陋矣

知州石鍵撰岱頂重修孔廟碑記

孔子後天地而生實與天地同始先天地而沒實與天地同終其道德功化不必存一感應之迹也而神靈自隨時隨地亘古亘今而常昭泰山秀甲中邦密邇聖居吾

夫子生前既親閱歷沒後自樂棲神其極頂翔鳳崗岱史載有

泰安州志

卷之四

十九

聖像本銅範後緣廟宇傾廢像移州學僅存故址明萬曆十三年濟南府推官郝公監臺譚公

相與謀建于玉帝觀西偏望吳門處曾遷任未果康熙甲寅歲江右黃冠吳雲建廟塑石範

聖像暨四配神像以成其志迨流傳三十餘載幾同茂草今

撫都院李憲崇儒重道於康熙五十六年丁酉春檄修泰山各廟兼命經營

聖廟遂建正殿三間並東西配殿更設牌坊以彰聖蹟整盤路以便自下登拜種種鉅規悉經略備

適因是夏大水冲山以致規模雖具而道貌未飾州佐石門張君是冬有事於岱頂月餘虔心

加彩於十月既望新像安神而次日 孔府聖公偕博士諸君詣頂瞻拜夫神位甫安而聖裔

適至孰非

夫子之靈有以默啓者乎雖然吾

夫子廣大如天博厚如地舉世尊之而其靈自若即世無尊之者而其靈亦自若豈必沾沾焉以是

彰其感應哉而特是神固不容掩也靈固不容泯也如元宦者李邦寧釋奠風狂燭滅明天啟

太學生妄擬魏闢祀旋遭季路挺擊嗚呼感應若是我

夫子之神化殆真如天不言而日星雷雨之顯燦地不言而山川雲物之昭著也哉且夫莫爲之前雖美而不彰莫爲之後雖盛而不傳倘同心同德之君子鑒經始之苦心而昭修于奕禩俾廟貌永新巍煥永昭其斯文之幸歟其斯道之昌歟夫宣揚 聖德使世樂奉其教刺史之事也因爲之溯其源流表其靈爽以見古今一

孔子卽古今一天地而岱宗實藉以大其光焉按

聖廟今載入泰山各廟修工冊內經費固已有賴嗣後一體加葺殊易爲力併附白云

碑立岱頂文廟

日講官起居注左春坊左中允提督江南學政兼翰林院編修林之濬題捨身崖墻記

康熙丁酉歲泰山盤路傾圮

皇上命臣之濬暨江西學臣魚鸞翔來東修理因登頂觀泰安同知張奇逢築墻禁止捨身一事爰操管以爲之記

泰安州志

卷之四

二十一

日觀之東有崖焉陡絕萬仞望而目眩心掉者久之俗名爲捨身村鄙小民其計窮無可復之者往往甘心糜爛欲以幸來生福利其始也不知創自何人後遂沿以成習歲或一二見州佐守張君怒然傷之丁酉冬君奉檄監嶽項稅未匝月以捨身告者凡三人君益慘惻不自安因築垣以阻其徑其長三百餘尺高十有五尺募山之踐更者守之有徘徊垣下及踰垣而跳者則詰其所由來爲之寬譬而遣之自是閱五歲不聞有捨身者君慮垣日久寢以頽毀守者亦因以懈怠後之人不能繼其志也請余爲文勒諸石以垂不朽嗚呼自一命而上凡有斯民之職者其孰不當留心於民事况視無辜之民至於碎肌膚折筋骸以死而能漠然無所動其心也哉君非欲夸大其事自以爲功也然余獨怪山之神歲奔走有事者以億萬計而不能牖民以全其生豈適當其數有莫得而逃者歟然自君設是法免民於死者已歷有五年則凡杳冥荒誕之說舉不足道而有民心瘼者誠宜因事補救不得聽之適然之數也審矣後之君子其亦有慨然感於中而益以推廣張君之志於勿替也歟張君名奇逢浙之石門縣人

碑砌北關外聖母行宮

署州事同知張奇逢築牆禁止捨身記

岱岳之效靈久矣而氣數與人事或乖則效靈者轉有時而厲世州境居民每歲六月六日老幼男婦登頂瞻拜者類數萬計俗名曰團圓香康熙丁酉季夏是日登頂倍盛往歲適午後大雨滂沱咸避旅廟宇間夜半蛟發大龍口水涌奔騰隨流裸喪供波臣飽有之嗚呼此雖人事之失孰非氣數所致哉 上憲惻然不忍捐金委余設醮掩埋更慮盤路冲圯登涉維艱恐香稅缺額檄余赴頂查核稅單旬日之內目擊李進賢韓大小張文舉捨身隕命者三嗟乎此豈等暴水於氣數而不盡關人事耶抑亦惑於世俗訛傳

聖母得道是崖之說而欲尤而效之耶噫吁何其誣也夫岱史載

聖母本西牛國奉符縣石氏女生東漢明帝永平七年四月十八日修煉泰山後石塢成真彰彰顯據而世顧安得以自誣者誣

聖母哉余又安忍諉之數聽之人而不爲之區畫哉遂於戊戌春築牆以阻之復派更夫以守之且

刊之示勒之石以驚之喻之自是閱五載竟無一泣夜臺者矣嗚呼卽是而乃知天下無不可挽之人心無不可回之氣化特載之志末以告後此 在位仁人倘鑒余衷採余言以廣維風易俗之善政固余之厚望而亦斯世斯民之幸也夫

碑立遙參亭

重修泰安州志後序

岱舊有志所以紀山川土地人物風俗忠孝節義之蹟彰風教而維人心者也明神宗時太守任公貞始纂修迄今七十餘年無復起而繼之者夫七十餘年中兵荒鼎革凡志士仁人奇行苦節而名淹沒者可勝道哉點不才忝列學宮三十餘年篤志聖教凡所知孝子節婦輒首諸生上之郡郡太守上之撫憲具

題旌表焉然第爲一時事耳非千秋事庚戌歲太守鄒公來守是邦撫字之餘卽博求岱之山川土地人物風俗忠孝節義之蹟而攷其實時少司農王公致政家居闔門讀書多識前言往行待御趙公亦舊有所纂藏帖鄒公因相與議曰

聖主御極天下承平岱志之重修不可緩也于是採故實定筆削歷期年而岱志成點焚香披讀不惟山川人物離然可考而奇行苦節足以維人心彰風教者直與日月爭光矣鄒公之繼任公而修斯志也其爲世道人心計者豈其微哉點于是拜手紀略以告後之讀斯志者非敢僭

而筆于簡末也

峕

康熙十年春正月郡庠首貢生朱衣點薰沐拜識

